

მით უარესი პესიმისტებისთვის!

თბილისი. “ლოკომოტივის” სტადიონი. 10 აპრილი.

“დინამო” (თბილისი) – “დინამო” (მოსკოვი) – 1:0 (1:0).

თბილისი: გოგია, დოძუაშვილი, ჭელიძე (ებრალიძე), ხურცილავა, პეტრიაშვილი, გავაშელი, მჭედლიშვილი, ასათიანი, გუცაევი, გ. ნოღია, ყოფიანი.

მოსკოვი: პილგუი, ბასალაევი, ანიჩკინი, ზიკოვი, დოლბანოსოვი, ჟუკოვი, იაკუბიკი, საბო, კოზლოვი (ემტრეკოვი), გერშკოვიჩი, ევრიუჟიხინი.

მსაჯი: ვ. ალოვი (ლენინგრადი).

დუბლიორები – 1:2. ბურთები გაიტანეს სიტკინმა (მოსკოვი) და რეხვიაშვილმა.

კორესპონდენტთა ლოჯაში ჩემს გვერდით აღმოჩნდა სსრ კავშირის დამსახურებული მწვრთნელი ა. ნორაკიძე. მატჩის წინ მან თქვა: ნახეთ, თუ ბესკოვმა ნახევრად არ შეცვალოს გუნდიო. ა. ნორაკიძეს მხედველობაში ჰქონდა ის, რომ თბილისისა და მოსკოვის დინამოელთა მატჩზე საგანგებოდ ჩამოვიდნენ მზვერავები – ბერლინის “დინამოს” მწვრთნელები, რომლებსაც ყოველმხრივ, დეტალურად სურთ შეისწავლონ თავების მფლობელთა თავის გათამაშებაში თავიანთი ნახევარფინალური მეტოქე ლვოვის მატჩის წინ.

მართლაც, როცა მოსკოველთა მწვრთნელმა სამსაჯო ოქმი შეავსო, მასში არ აღმოჩნდა ბერლინის მატჩის ოთხი მონაწილე: დოლმატოვი, მახოვიკოვი, ბაიდაჩნი და კოჟემიაკინი. ამას გარდა, საბო სტოპერის ადგილიდან დაძრეს წინ – ნახევარდაცვაში. როცა კ. ბესკოვს ვკითხეთ ამ კარდინალურ ცვლილებათა მიზეზი, მან კონკრეტულ პასუხს თავი აარიდა და ზოგადი ფრაზით გვიპასუხა: სხვადასხვა მოსაზრებითო. შეიძლება, მოსკოველთა მწვრთნელს შემადგენლობაში შენიღბვის გარდა სხვა გეგმაც ჰქონდა; კერძოდ ის, რომ ეს ძნელი მატჩი თბილისის თანაკლუბელებთან მიენდო იმ გამოცდილი, ნაცადი ფეხბურთელებისთვის, ვისაც უკვე აქვს თავის ზურგზე გადატანილი თბილისელებთან ჩატარებული თამაშების სიმძიმე, კარგად იცნობს მეტოქის ძლიერ და სუსტ მხარეებს.

მოსკოველებს, ისე როგორც არც ერთ გუნდს საბჭოთა ფეხბურთში, საშუალება აქვთ მოახდინონ ნებისმიერი ხასიათის ცვლილებანი თავიანთ შემადგენლობაში. ახლა, ჩვენი აზრით, ეს ყველაზე პერსპექტიული კოლექტივია, მწვრთნელს შეუძლია აქცენტი გააკეთოს ახალგაზრდების სისწრაფესა და ენერჯიაზე, ან ვეტერანების გამოცდილებასა და ოსტატობაზე. თბილისის “დინამო” კი უფრო სტაბილურია და თუ აქ ცვლილებები მოხდა, ეს უპირატესად მოთამაშეთა ავადმყოფობით ან ტრავმებითაა გამოწვეული. მაგალითად, ამ მატჩში კვლავ ვიხილეთ ნახევარდაცვის წამყვანი მოთამაშე, გამოჯანმრთელებული ასათიანი, თავდასხმის მარცხენა ფლანგზე კი ადგილი დაიკავა ყიფიანმა, რომელიც წინა თამაშებში უმთავრესად ლ. ნოღიას ცვლიდა ბოლო წუთებში.

მოსკოველებმა თავიდანვე, პირველივე წუთებიდან სცადეს ხელთ ეგდოთ ინიციატივა, რათა თავიანთი გეგმით წარემართათ თამაში: კოზლოვი და გერშკოვიჩი გაორმაგებული ცენტრის სახით მოქმედებდნენ შეტევის ცენტრში, ამასთან, განუწყვეტლივ ცვლიდნენ ადგილებს, ცდილობდნენ ყოველი იერიშის წამროებისას ახალი, მოულოდნელი პოზიცია შეერჩიათ ბურთის მისაღებად. ამას გარდა, ევრიუჟიხინი იშვიათად ჩნდებოდა იმ ფლანგზე, რომლის “მომსახურება” N11 ფეხბურთელს ეკისრება საერთოდ.

სტუმრების ეს მანევრი გასაგები იყო: თავდამსხმელთა ხშირ გადაადგილებებს, იერიშებში საბოსა და იაკუბიკის აქტიურ მონაწილეობას უნდა გამოეწვია დეზორგანიზაცია თბილისელთა მცველებს შორის, შეექმნა იქ ღია ადგილები. მაგრამ ამ ჩანაფიქრიდან არაფერი გამოვიდა. ხურცილავას, ჭელიძისა და პეტრიაშვილის თამაშით ჩვენ უწინაც კმაყოფილი ვიყავით და ეს სამეული ახლაც შეუცდომლად თამაშობდა, ხოლო დოძუაშვილმა, რომელიც წლეულს ვერ იყო საჭირო ფორმაში, უნაკლოდ ჩაატარა მატჩი. მოსკოველთა შეტევები სისტემატურად იმსხვრეოდა მოპირდაპირე საჯარიმო მოედანზე, მაგრამ, როცა მათი დარტყმული ბურთები მაინც აღწევდა მეკარემდე, გოგია მათ შესანიშნავად იგერიებდა. კერძოდ, თბილისელთა კარის დარაჯმა ბრწყინვალედ აიღო კოზლოვის ძლიერი დარტყმა და ის ბურთი, რომელიც ჭელიძემ ჩაჭრა ხაკუთარი კარისკენ სულ ახლოდან. ერთხელ, 32-ე წუთზე, გერშკოვიჩმა რამდენიმე მეტრიდან ძელს მოახვედრა ბურთი.

მატჩის მსვლელობაში და მის საბოლოო შედეგში დიდი როლი ითამაშა მასპინძელთა ნახევარდაცვამ. წინა შეხვედრებისგან განსხვავებით, ეს იყო მობილური, აქტიური, შემტევი რგოლი, სადაც საუკეთესოდ გამოიჩინეს თავი გავაშელმა და ასათიანმა. გოლიც, რომელმაც გადაწყვიტა შეხვედრის ბედი, ნახევარდაცვის დამსახურებაა. მე-9 წუთზე გავაშელმა ინდივიდუალური გარღვევა

შეასრულა მარჯვენა ფლანგზე და სწრაფად მოჭრა კუთხე ცენტრისკენ, სადაც მას ღია პოზიციაში მყოფი მჭედლიშვილი უცდიდა. გავაშელმა თვითვე სცადა თავისი რეიდის დასრულება და ზუსტად დაარტყა კარში. პოლგუსის ნახტომმა დაიგვიანა _ 1:0.

მაღალი ტემპი წამითაც არ შენელებულა პირველი 45 წუთის განმავლობაში. ჩვენი გუნდის თავდასხმაში ამ ტემპის სულისჩამდგმელი იყო გუცაევი. ახალგაზრდა გარემარბი საოცარი სისწრაფით და მრავალფეროვნი ფინტებით სძლევდა თავის უშუალო დარაჯს ზიკოვს და ზედიზედ ქმნიდა სახიფათო მომენტებს მოპირდაპირე კართან. ზიკოვის სასახელოდ მხოლოდ ის უნდა ითქვას, რომ მან რაინდულად გადაიტანა ეს 90-წუთიანი მძიმე “ეგზეკუცია” და არც ერთხელ უხეშად არ უთამაშია გუცაევთან, მაშინ, როცა მისმა დამზღვევმა დოლობონოსოვმა ყველა აკრძალული საშუალება გამოიყენა თავისი მდიდარი “არსენალიდან”.

შესვენების შემდეგ თბილისელთა აწყობილი ანსამბლი შესამჩნევად დაირღვა. წინა ხაზზე თავდამსხმელები ხშირად კარგავდნენ ბურთს. სტუმრების ნახევარდაცვას საშუალება მიეცა ემოქმედა დიდ ტერიტორიაზე, დახმარებოდა ფორვარდებს, მაგრამ თბილისელთა დაცვა და ნახევარდაცვა თავგამოდებით იგერიებდნენ სახიფათო მომენტებს. მათ ეს მძიმე ამოცანა გაუადვილა იმან, რომ გერშკოვიჩი ამოვარდნილი იყო თავისი გუნდის საიერიშო გეგმიდან და მეტწილად უთავბოლოდ ატარებდა ბურთს. ვერც ემბრეკოვის გამოსვლამ მოიტანა რამდენადმე მაინც ეფექტური შედეგი. თბილისის “დინამომ” მოიგო ეს უაღრესად პრინციპული და საპასუხისმგებლო მატჩი.

თამაშის წინ, პროგნოზების პერიოდში, თბილისელთა ბევრი გულშემატკივარი უიმედოდ იყო განწყობილი და სახეიროს ვერაფერს წინასწარმეტყველებდა. ჩვენმა ფეხბურთელებმა კი კარგი გაკვეთილი მისცეს პესიმისტებს. მით უარესი პესიმისტებისთვის!

ბ. ქორქია.

“ლელო”, 12 აპრილი, 1972 წ.